

Lita Paulalu Walkatjura

Iyantja Ngura Ipitjalakutu

Ephesians

Nyangatja Ngañmanytju

Nyakula Wangkanytjaku

Nyangatja Godaku tjukurpa Paulalu walkatjunkunytja tjailangka unngu nyinara, munu paluru Jesuku walytja tjuṭakutu iyañu ngura nyara Ipitjala nyinanytja tjuṭakutu. Ka tjukurpa Ipitjanyatjara Luke-alu walkatjunu nyiri panya *Jesulu Iyantja Tjuṭangku Palyantjitungka* chapter 19 munu 20-ŋka, panya Paulalu ngura nyara palula tjukurpa Jesunyatjara ngañmanytju wangkanytja.

Ka lita nyangangka Paulalu tjananya wangkara nintini panya Jesuku walytja tjuṭa ngura uwankaranguru walytjapiti kutjuṭu nyinanytja, ka panya Christianity palumpa walytjapiti uwankaraku Mayatja nyinanyi. Munu Paulalu alatji kulu wangkangi lita nyangangka, panya Godalu anangu palumpa walytja tjuṭa witulyankunyangka mamu panya kuralpailu tjananya putu kurara mauntankupai Jesulanguru.

Tjukurpa nyanganpa ngarinyi:

1:1-2 Paulalu ngañmanytju wangkanytja

1:3—3:21 Jesuku walytjapiti uwankara palula tjungu kutjuṭu nyinanyi

4:1 —6:9 Jesuku walytja tjuṭa uti wirura
palyanyku nyinama nyanga alatji
6:10-20 Godalu Jesuku walytja tjuṭa kuṇpulpai
mamungku kurantjaku-tawara
6:21-24 Paulalu tjukurpa malatja wangkanytja

Paulalu Ngañmanytju Wangkanytja

¹ Uwa, Jesuku walytja tjuṭa, ngayuluṇa Paulalu nyurampa lita nyangatja walkatjunanyi ngura nyara Ipitjala nyinanytja tjuṭaku nyura Jesunya Christanya mulamulangku wañannyangka. Panya Godaluni ngurkantara tjunu Jesuku Christaku tjukurtjara waṛkarinytjaku munuṇi witura iyaṇu palumpa tjukurpa aŋangu tjuṭangka tjakultjunkunytjaku.

² Ka Mama Godalu Mayatja Jesulu Christalu kulu nyuranya pukultju pulkangku kanyinma munu nyuranya kurunpa rapara pukulmanama.

Godalu Nganañanya Pukułmankunytja Christalanguru

³ Godanya Mayatja Jesuku Christaku mama nyinanyi, panya nyara paluru palumpa God. Kala wanyu palunya pulkara wal kunma, panya palurulanya Christalawanungku kurunpa winki pukulmanu, panya ngura ilkaritjangka tjananya pukulpa mulapa kanyini, palu purunypa.

⁴ Palulangurula uti palunya wal kunma panya kuwaripatjara mulapa uwankara wiyangka paluru nganañanya ngurkantanu palumpa walytja nyinanytjaku munu Christala tjunguringkula palula miṛangka palya alatjiṇu nyinanytjaku. Kalanya kutjupangku

nyakula putu kuranmananyi Christala tjungu ngaranyangka.

⁵ Panya Godalu mukulya pukangku nganananya ngurkantanu palumpa katja untalpa nyinanytjaku, Jesula Christalanguru. Paluru alatjitu nganampa mukuringu munulanya paluru kutjungku kulira ngurkantanu. ⁶ Kala uti palunya pulkara walkunma paluru nganampa pulkara mukuringkunytjitunguru, panya paluru palumpa katjaku pulkara mukuringkupai munu paluru pukultju pukangku nganampa palyanu katja palumpa intjanungku mantakutu iyara. ⁷ Ka nyara paluru punu katakutjarangka ilura milkali tjutira nganananya ngalkinu, kalanya Godalu mukulya pukangku nganana kura palyantjtjanguru kalypangku pungkuwiyangku wantinyi. ⁸⁻⁹ Kala pulkara alatjitu pukularingu Godalu alatji nganampa pukultjungku palyannyangka.

Uwa panya Godalu ninti pukangku nganmanytju kuliningi palumpa katja mantakutu iyantjikitjangku nganananya wankarunkunytjaku, munu alatji kulira palyanu alatjitu. Nyanga palunya paluru kutjungku kuliningi nganmanytju munu kuwari utinu nganana tjukarurungku kulintjaku kulintjtja panya palunya. ¹⁰ Munu ngula Tjintu Malatjangka Godalu nganmanytju kulintja uwankara palyalku, ka Christalu uwankara kutjuringkunytjaku palyalku Godalu panya palyantjtja uwankara ilkarnguru

munu mantanguru, munu paluru uwankara mayatjangku kanyilku.

11 Panya Godalu kulira uwankara palyantjikitjangku paluru palyalpai alatjitu. Munu nganmanytu paluru kulintjatjanungku nganañanya ngurkantanu palumpa walytja nyinanytjaku Christala tjungu. Nyangatja paluru kuwaripatjaranguru alatjitu ngurkantankunytjikitjangku kulinu. **12** Kala nganana Jew tjuta-warara Christaku mulamularingkula pukulpa patara nyinanyi. Palulanguru~~ula~~ uti nganana-warara Godanya pulkara mirawañima wiru mulapa witulya pulkanya. **13** Ka panya nyura kulu tjukurpa tjukaruru palya mulapa kulinu munu palumpa mulamularingu, tjukurpa panya wankarunkupaitjara kulira. Ka panya nyura mulamularingkunyangka Godalu nyurala walka puruny pa tjunu nyura palumpa walytja nyinanytjaku, panya watingku pulukangka walka tjunkupai kutjupa tjutangku ngurkantankunytjaku, palu purunytju Godalu Kurunpa Milmilnga nyuranya ungu kutjupa tjutangku ngurkantankunytjaku, panya nyura palumpa walytjaringkunyangka paluru Kurunpa Milmilnga nyuranya ungkunytjikitjangku kalkunu. **14** Kala nyara palulanguru nganana mulapa alatji kulini, “Panya Godalu nganañanya wiru mulapa ungkuku paluru panya kalkuntja.” Panya Godalu nganañanya nganmanytu Kurunpa Milmilnga ungu munulanya piruku ngula unganyitu ilkariringka wiru mulapa. Uwa, Mayatja Godanya palya mulapa witulya pulkanya, kala wanyu palunya walkura

mirawañima.

Paulalu Godala Tjapintja Tjanampa

15 Ngayulu kulinu nyura Mayatja Jesuku pulkara raparingkunyangka munu Godaku walytja tjutaku pulkara mukuringkunyangka.
16 Mununa nyara palulanguru ngayulu kulira pukularira Godanya rawangku mirawañinyi nyuralanguru wantintyta wiyangku. **17** Godanya panya Mayatja Jesuku Christaku mama nyinanyi, panya nyara paluru palumpa God nyinanyi palya mulapa witulya pulkanya. Kana palula rawangku nyurampa tjapilpai nyuranya Kurunpa Milmilnga ungkunytjaku. Ka paluru nyurala unngu nyinara pulkara nintilku nyura Godaku ninti mulararintjaku. **18** Uwa, rawangkuña nyurampa tjapilpai paluru nyurampa kulintja tjukaruruntjaku. Ka nyura nintiringkula uti kuliklu panya paluru nyuranya ngurkantanu nyura ngula ilunyntjatjanu pakara wanka tiütjara nyinanytjaku palula tjungu, palumpa mulamularingkunytjatjanu. Munu nyara palulanguru nyura nintiringkula kuliklu, “Mulapa Godalu kalkuntjatjanungku palyalpai alatjitu munu palumpa walytjapiti pulkara pukulmankupai witulya pulkangku.”

19-20 Uwa ngayulu tjapilpai nyurampa paluru nyurala unngu nintintjaku nyura alatji kulintjaku, “Mulapa Godaku witulya pulka alatjitu nganañala ngaranyi palumpa mulamularingkupai tjutangka.” Panya Godalu witulya pulkangku Jesunya ilunyangka pakaltjinganu munu ngura ilkaritjangka

tjunu palula kampa wakungka nyinanytjaku mayatja pulka. Ka witulya nyara paluru panya nganaŋala ngaranyi munulanya kuŋpulpai. **21** Uwa, Godalu panya Christanya pulka mulapa tjunu uwankaraku mayatja pulka nyinanytjaku ilkaritja tjutaku, munu mayatja mantatja uwankaraku kuļu. Christanya panya pulka mulapa angelpa tjutangka muŋkara, munu mamu tjutangka muŋkara munu mayatja kutjupa tjutangka muŋkara pulka alatjiu nyinanyi munu tiṭutjara mayatja pulka nyinara mayatjangku uwankara kanyilku.

22 Uwa, Godalu palunya Mayatja pulka tjunu, ka uwankara palula tjaru ngaranyi, ka paluru uwankara mayatjangku kanyini. Munu palulanguru uwankara mayatjangku kanyira paluru palumpa walytjapiti maunṭalpa wirura atunymara kanyini. **23** Panya Christalu nganaŋanya palumpa walytjapiti palurunku alatjiu kanyini. Panya puntu kata wikitjara anangu wanka ngarapai, palu purunypa Christanya nganampa kata ngaranyi, ka nganaŋa palumpa puntu ngaranyi, munula palula tjungu ngarala kutju wanka nyinanyi.

2

Ilunytjatjanu Wankaringkunytja

1 Panya ngañmanypa nyura Godanya kulintja wiya nyinangi kura kutju palyalpai, Godanya wiyangka-palku. **2** Munu nyura iwara kurangka anangi ngunti tjutaku mukuringkula munu nyura mamu arkayitjangka wangaŋarangku

kuliningi. Mamu nyara paluru panya mamu kurunitja tjuta mayatjangku kanyini munu aŋangu Godala tungunpungkupai tjuta kuļu kanyini mayatjangku.

³ Panya nganmanypa nganana palu purunypa nyinangi munula walytja pulkara mukuringkula kura tjuta kutju palyalpai Godanya kulilwiyangku. Nyara palulangurula Godanya nganampa mirpaŋarinytjaku palyaningi, ka nganaŋanya uwankara ngurkantara pungkunytjaku ngarangi. ⁴ Palu Godanya ngaltunytju pulkanya munu paluru nganampa pulkara mukuringkupai. ⁵ Panya nganaŋa kura kutju palyalkatingi Godanya wiya-palku kulira munula palula rawa mulapa tungunpungkula watarku alatjitu nyinangi ilunytja purunypa. Palu Godalu nganaŋanya ngaltunytju pulkangku wankarunu Christala tjungura. Tjinguru paluru nganaŋanya wantima, palu paluru nganampa pulkara mukuringkula nganaŋanya mukulyangku wankarunu.

⁶ Nganaŋa kurunpa watarku nyinangi ilunytja purunypa, ka paluru Christalanguru nganaŋanya wankarunu kurunpa wanka palula tjunguringkula mayatjarira nyinanytjaku ngura ilkaritjangka. ⁷ Paluru nyanga alatji palyanu nganampa ngaltunytju mukulya pulka nyinara, panya paluru nganampa pulkara mukuringkula Jesunya Christanya iyanu mantakutu nganampa ngalkilpa ilunytjaku. Kala nyanga palulanguru palumpa mukulya pulka nintingku kulini, titutjarangku watarkuriwiyangku.

⁸ Panya nyura kurunpa watarku ilunytja purunypa nyinanyangka Godalu nyuranya mukulyangku wankarunu, nyura palumpa raparingkunyangka kutju. Nyura walytja kurunpa wankaringkunytja wiyat , palu Godalu ngaltunytju pulkangku nyuranya kurunpa wankarunu, nyurampa pulkara mukuringkula. ⁹ Ka nyara palulanguru nyuranku uti walytjangku ngunti ka any-ka anytju mirawa intja wiyangku wantima, panya nyura kutjupa kutjupa palyantja wiya alatjitu Godalu nyuranya nyakula kurunpa wankarunkunytjaku, panya nyura palumpa mulamularingkunytjaku kutju ngaranyi.

¹⁰ Ka Godanya nganampa mukuringanyi wir ra palyanyku nyinanytjaku palula kulira. Palulanguru paluru Jesunya Christanya nganampa iyanu ngana anya kurunpa wankarunkunytjaku. Kala palulanguru kutju wir ra nyinanyi Christalu ngana anya kurunpa palyannyangka.

Christala Kutjuringkunytja

¹¹ Kaya wanyu kulila panya nyura ngan anyapa nyinanytja. Panya nyura anangu Gentile tjuta nyinangi Jew wiya, panya Godalu Aipur amala iriti wangkanytja nyura kulira palyantja wiyat . (Ka panya wati Jew tjutangku nyuranya analpai tjananya purunypa watiringkula nyinanytja wiyangka.) ¹² Nyara palula arangka nyura maunthalpa nyinangi Christala tjungu wiya, munu nyura Israelkunu tjutaku walytja wiyat  nyinangi. Munu nyura

Godalu tjananya kalkuntjitjaku ngurpatu watarku nyinangi. Munu nyura munkaritja Godalu ngula wiru nyurampa palyantjaku kulintja wiya alatjiitu watarku nyinangi, Godanya wiyangka-palku.

¹³ Mulapa panya nyura maunṭalpa nyinangi, ka panya Jesunya Christanya nyurampa angailungu munu milkaļi tjutira nyuranya Godala tjungunu palumpa walytjaringkunytjaku. ¹⁴ Panya paluru alatjiitu nganañanya uwankara maunṭalpa nyinanyangka kalypara tjungunu Jew tjuta munu Jew wiya tjuta kulukulu. Panya nganmanyapa nyuntu nganaña paṭupatu nyinangi mirpaṇtju tjuta wall-pa pulka purunypa ngururpa ngaranyangka. Palu Christalu palurunku puntu walytjangku iluntankunytjaku ungkula mirpaṇpa panya palunya wiyanu munu nyuntunya nganañanya kalypaṇu. ¹⁵ Panya nganaña Jew tjutangku tjukurpa pulka tjuta nganañanku kanyiningi kunpu mulapa, palu Christalu ilura tjukurpa pulka tjuta palunya tjananya wiyaringkunytjaku palyaṇu. Munu paluru nganañanya Jew tjuta munu nyuranya Jew wiya tjuta palula tjunguringkunytjaku palyaṇu nyuntu nganana kalyparingkula kutjuringkunytjaku.

¹⁶ Panya nyuntu nganaña nganmanyapa maunṭalpa maunṭalpa nyinangi mirpaṇtju tjuta. Palu Christalu puṇu kaṭakutjarangka ilura nganampa mirpaṇtju panya palunya wiyanu alatjiitu. Palurunku anangu kutjara ngaranytja kutjuṇu palula, panya paluru mukuringangi anangu panya palunya tjananya

małakungku Godala tjunguntjikitja. Nyanga alatji paluru palyańu puńu kałakutjarangka ilura. ¹⁷ Panya paluru pitjangu munu Tjukurpa Palya wangkangi nyurala ańangu Jew wiya tjutangka Godalanguru pańu nyinanyangka nyura kalyparingkunytjaku. Munu paluru palu purunyjtü Tjukurpa Palya wangkangi nganańala ańangu Jew tjutangka kuļu Godala ila nyinanyangka nganańa kuļu kalyparingkunytjaku.

¹⁸ Uwa, mulapa Christalanguru nyuntu nganańa uwankara Jew munu Jew wiya tjuta Mamala tjunguringkula kutjuringkupai Kurunpa Milmilngatjararingkula. ¹⁹ Ka nyanga palulanguru nyura Jew wiya tjuta kuwari malikitja puruny whole, palu nyura Godaku walytjapitingka tjunguringu munu nyura kuwari Godaku walytja alatjiultta nyinanyi. ²⁰ Panya nyura mulamularingkupai tjuta Godaku alatjiu nyinanyi. Ka paluru nyuranya walytjanmara kanyini. Panya nintintja tjutangku munu wangkatjara kuwaritja tjutangku kuļu nyurala Godaku tjukurpa tjakultjunangi. Ka nyura kuļira Christaku mulamularingu munu palumpa walytjaringkula kuńpu ngaranyi palula tjungu. Panya paluru alatjiu-mańkul witulya pulka nyuntumpa nganampa nyinanyi. ²¹ Munu paluru alatjiu nyuntunya nganańanya tjungura kanyini witulya pulkangku nganańa palunya tjukařurungku wal kuntjaku. ²² Ka panya Christalu nyuranya kuļu altira tjungunu munu ańangu kutjupa tjuta kuļu palula tjunguringkunytjaku palyańu. Ka Godaku

kurunpa nyuntula nganaŋala uwankarangka nyinanyi, palumpa walytja tjutangka.

3

Paulalu Jew Wiya Tjutangka War̄karinytja

¹ Palu ngayulu kuwari tjailangka nyinanyi, panya Jesulu Christalu ngayunya nyuralakutu iyanu nyurala Jew wiya tjutangka Tjukurpa Palya tjakultjunkunytjaku. Kan̄iya mirpantju tjutangku nyurala tjakultjunkunyangka witira nyangangka tjunu. ² Ka panya nyura ninti ngayuku, panya Godalu ngayunya ngaltunytyju pulkangku ngurkantara tjunu war̄ka nyanga palunya palyantjaku munu nyuranya alpamilara kuŋpuntjaku. ³ Munuŋi paluru tjukurpa kumpilitja uwankara nintinu, kaŋa nyangatja tjukutjuku nguwanpa nyurampa walkatjunanyi. ⁴ Ka nyura tjukurpa nyanga kumpilitja ngayulu utira walkatjunkunytja nyakula wangkarampa kulilku, “Mulapa paluru nintiringu tjukurpa Christaku panya kumpilitja tjutaku.”

⁵ Panya ngaŋmanyitja tjutaya tjukurpa nyanga kumpilitjaku ngurpa nyinangi, panya kutjupangku tjanala tjakultjunkunytja wiyat̄u. Palu kuwari nyanga Kurunpa Milmiltawanungku Godalu tjukurpa panya palunya utinu, wati panya Jesulu iyantja tjutangka, munu panya wangkatjara kuwaritja tjutangka kuļu tjana tjukarurungku tjakultjunkunytjaku. ⁶ Ka tjukurpa panya kumpilitja paluru nyangatja panya Godalu iriti kalkunu Jew tjuta walytjanmara

wirura kanyintjikitjangku. Palu kuwari Jesulanguru paluru kalkunu kutjupa tjuta kulu walytjanmara kanyintjikitjangku Jew tjuta kutju wiya. Kala nyara palulanguru Jesula Christalawanan tjukurpa palyaku mulamularingkula tjunguringkuku Godaku walytjapiti, Jew tjuta munu kutjupa tjuta kulu.

⁷ Panya Godaluni ngaltunytjungku ngurkantara witulyanu palumpa warkarinytjaku mununi tjukurtjara tjunu witulya pulkangku.

⁸ Palu ngayuluna tjanala pulka wiya alatjitu tjukutjuku mulapa ngaranyi, Godaku walytja kutjupa uwankarangka waintarinytja wiya. Palu Godaluni ngurkantara witulyanu kutjupa tjutangka Tjukurpa Palya Jesunyatjara tjakultjunkunytjaku, panya tjukurpa nyanga paluru pulka mulapa uwankarangka waintarinytja.

⁹ Panya paluru alatjitu ngurkantara witulyanu aŋangu winkingka tjukurpa nyanga kumpilitja palunya utira tjakultjunkunytjaku tjana kulintjaku alatji, “Munta-uwa, nyanga alatjingara Godalu aŋangu tjuta wankarunkupai.” Panya tjukurpa nyara palunya Godalu uwankara paluntjatjanungku kumpilpa kanyiningi kuwaripatjaranguru alatjitu ngula Jesuku walytja tjutawanu utiringkunytjaku. ¹⁰ Kaya ilkaringka angelpa tjutangku mayatja ilkaritja kutjupa tjutangku kulu Jesuku walytja tjuta nyakula kulilkul, “Munta-uwa, Godanya mulapa ninti pulka nyinanyi munu kutjupa kutjupa uwankara witulyangku palyalpai.”

¹¹ Ka mulapa Godalu nyangatja ngañmanyatju

kulinu nyanga alatji palyantjikitjangku munu panya Mayatja Jesunya Christanya mantakutu iyanu nganampa ngalkilpa ilunytjaku. Munu palulanguru Jesulu palyannyangka Godalu nganañanya wankarunu. ¹² Kala Christaku mulamularingkula palula tjungu nyinara nganaña ngulu wiya rapa ngaraku Godala mirangka. ¹³ Kaña nyuranya wangkanyi kurunpa tjituru-tjitururintja wiyyaya nyinama ngayulanguru, panya nyangatjaninya ngayunya tjailangka tjarpatjunu, ngayulu nyurala Jesuku tjukurpa tjakultjunkunyangka. Kaya pukulpa nyinama panya ngayulu tjukurpa tjakultjunkunyangka nyura Jesuku mulamularingu munu Godaku walytjaringu, kañiya nyanga palulanguru tjailangka tjunu.

Christanya Nganampa Mukuringkunytja

¹⁴ Uwa, Mama Godalulanya Jew tjuṭa munu kutjupa tjuṭa kuļu tjungura kanyini. Kaña nyanga palulanguru tultjungarakatira Mamala tjapini. ¹⁵ Panya paluru kutjungku paluntja uwankara wankarunu ilkaritja tjuṭa munu mantatja tjuṭa kuļu. ¹⁶ Kaña palula tjapini paluru witulya pulkangku nyuranya witulyankunytjaku, Kurunpa Milmiltawanungku, nyura kurunpa kuņpu ngaranytjaku. ¹⁷ Ka nyara palulanguru Christanya nyurala unngu nyinaku nyura palumpa rapa ngaranyangka. Kaña piruku palula tjapini nyura kurunpa mukulyatjarangku kutjupa kutjupa uwankara rapangku palyantjaku. ¹⁸ Ka nyanga palulanguru nyuntu nganaña Godaku walytja uwankarangku kulikku

panya Christanya nganampa mukulya pulka mulapa ngaranyi uwankarangka waintarinytja. ¹⁹ Uwa, Jesunya Christanya nganampa pulkara alatjitu mukuringkupai ngaltunyntju pułka mulapa, kana mukuringanyi nyura kułu mukulya nyanga pulka palula ngaranytjak, ka nyura mukulya nyanga palula ngarala palya mularariku Godanya purunypa.

²⁰ Uwa, Godanyala mirawanima. Panya paluru witulya pulkangku ngananaala unngu nyinara pulka mulapa palyalpai. Panya nganana Godala tjapilpai ka paluru kulira nganana mukuringkunytjtjangka waintara pulka mulapa palyalpai. Tjingurula kutjupa kutjupaku mukuringkula tjapintjikitjangku kuliklu, ka paluru kulinnyangka nyakula palyalku pułka mulapa waintara alatjitu. ²¹ Kala wanyu Jesuku Christaku walytja uwankarangku tjungungku Godanya titutjarangku walkura mirawanima wiru mulapa witulya pulka nyinanyangka. Uwa, mulapa.

4

Christalu Nganananya Warka Kutju kutju Ungkunyta

¹ Uwa ngayuluña kuwari tjailangkatu nyinanyi panya Mayatja Jesuku warkarinyangkaniya witira tjarpatjunu. Kana lita nyangangka nyuranya wangkara wituwituńi nyura Godaku walytja nyinara wirura palyanyku nyinanytjak. Panya Godalu nyuranya ngurkantanu palumpa walytjaringkula tjukaruru nyinanytjak.

² Munuyanku tiṭutjara kañany-kañanypa wiya purkara nyinama munuya purkaṛangku wangkama mapalku mirpañarintja wiyangku, munuya aŋangu kutjupa tjutjaku mukulya pulka nyinama. ³ Panya Kurunpa Milmiltu nyuranya kurunpa kuṇpura kanyini tjungu kutjuṭu nyinanytjaku. Kaya palulanguru kalypa nyinama rawa tjungu nyinanytjikitja.

⁴ Panya nganaña Jesuku walytja uwankara kutjuringkula nyinanyi. Ka Kurunpa Milmiltu kutjungku nganañanya wirura kanyini. Ka nganaña kutjuku paṭara nyinanyi kulil-kulilpa, panya Godalu nganañanya ngurkantanu ngula ilunytyatjanu pakara wanka titutjara nyinanytjaku, kala nyanga palumpa paṭara nyinanyi.

⁵ Panya nganampa Mayatja kutju nyinanyi, Jesunya Christanya. Ka nganaña tjukurpa kutjuku mulamularingkupai, tjukurpa panya Jesunyatjaraku. Munula baptise-katinyta kutju kulilpai. ⁶ Ka panya Godanya Mamanya kutju alatjiṭu nyinanyi nganampa uwankaraku. Nyara paluru uwankaraku mayatja, munu nganañalawanungku palyani paluru mukuringkula, munu nganañala uwankarangka unngu nyinanyi.

⁷ Panya Christalu pukultjungku nganañanya kutju kutju nintinu war̄ka palumpa nganaña kutjungku kutjungku witulyangku palyantjaku.

⁸ Panya nyiringka iriti walkatjunkunytja ngaranyi alatji,

“Paluru katu mulapa tatiṛa aŋangu karpintja mungilyi katingu,

munu paluru aŋangu tjuta mukulyangku
nintinu witulyangku palyantjaku.” *

9 Ka nyanga katu ankunytja wangkara alatji nintini panya paluru nganmanypa katunguru tjaru mulapa ukalingu manta unngutjaku. **10** Munu ukalingkunytjatjanu panya paluru tu piruku małaku katu mulapa tatinu ilkaringga waintara pulka mulapa nyinanytjikitja uwankarangku palunya nyakula mayatjanmara walkuntjaku manta winkitjangku. **11** Nyanga paluru panya nganaŋanya kulu nintinu palumpa war̄ka kutjupa kutjupa witulyangku palyantjaku, munu panya kutjupatjara ngurkantařa tjunu palumpa iyantja tjuta, munu kutjupatjara tjunu wangkatjara tjuta Godalu wangkanyangka aŋangu tjutangka tjakultjunkunytjaku, munu kutjupatjara tjukurtjara tjuta tjunu Tjukurpa Palya Jesunyatjara ngura tjutangka paratjakultjunkunytjaku aŋangu tjuta Jesuku walytjaringkunytjaku, munu kutjupatjara tjunu atunymankupai tjuta Jesuku walytja tjuta atunymara kanyintjaku, munu kutjupatjara tjunu nintilpai tjuta Godaku walytja tjutangka wangkara nintintjaku.

12 Nyanga alatji Jesulu nganaŋanya tjunu war̄ka kutjupa kutjupa tjuta palumpa palyantjaku nganana Jesuku walytja uwankara palula tjungu kunpuringkunytjaku. **13** Kala war̄ka nyanga palunya tjananya rawangku palyara nganana uwankara

* **4:8** Psalm 68:18

tjunguringkula Godaku katjaku tjukaruru mulamularingkuku palumpa pulkaṛa nintiringkula. Munula piṛuku tjitji purunypa rawa nyinanytja wiya aŋangu pulkaringkula Christanya purunyarira palyanyku nyinaku. ¹⁴ Munula palulanguru kutjupangku ngunti wangkanyangka kulira wantiku. Panya wati ngunti palya-palku nyinapai tjutangkuya tjukurpa kura tjuṭa wangkapai aŋangu tjuṭa kawantjingantjikitjangku. Palu nganaŋa Christanya purunyarira palunya tjananya ngunti wangkanyangka nintingku ngurkantankuku munula tjananya kulira wantiku ngunti kurantjaku-tawara.

¹⁵ Kala uti tjukarurungku wangkama Godaku mukulyatjarangku munula nyara palulanguru pulkaringkuku munu Christanya purunyariku panya paluru nganampa Mayatja pulka nyinanyi, Jesuku waltyja uwankaraku. ¹⁶ Munu paluru nganaŋanya uwankara tjungura kanyini kutjuringkula wanka nyinanytjaku. Munulanya paluru wanka kanyira nintilpai urira war̄ka palumpa kutjupa kutjupa tjuṭa palyantjaku. Kala nganaŋa war̄ka waltytjangku waltytjangku paluru nintinnyangka palyara ma-kunpuringkula mukulya pulkaringkupai.

Wanka Kuwaritja Christalanguru

¹⁷ Kulilaya! Ngayuluṇa Mayatjanya waŋarira kulilpaingku nyuranya wangkara paini nyura aŋangu watarkitja tjuṭa purunypa nyinanytja wiyangku wantintyjtjaku, panya paluru tjanā Godaku ngurpangku tjukurpa kurakura tjuṭa

kutju kulilpai. ¹⁸ Panya tjanampa kulin-tja mungawaluru maunṭalpa alatjiṭu ngaranyi wankakitjangku kulintja wiya. Godalu tjananya wankarunkunytjaku ngaranyi alatjiṭu, palu wiya, tjana kurunpa wituwituringkula kulira wantinyi munuya tungun-tungunpa alatjiṭu nyinanyi. ¹⁹ Munuya kuṇṭa wiyangku kura kutju alatjiṭu palyalkatipai kura pułka mulapa, munuya tjukaruru wantira kuraku manyu nyinapai.

²⁰ Wanyu Christanya nyanga tjana purunypa nyinapai? Wiya alatjiṭu. ²¹ Ngayulu nyurampa ninti, panya nyura tjukurpa tjukaruru Jesunyatjara ngañmanytju kulinu. Kutjupa tjutangku panya nyurala tjukarurungku nintiningi tjukurpa panya palunya. ²²⁻²³ Nyara palulanguru nyura palumpa nintiringkunytjatjanungku uti kura tjuṭa wantima rawangku palyantja wiyangku. Panya ngañmanytju nyura kura tjuṭaku mukuringkula nyanga palu purunypa tjuṭa palyaningi, munu nyura kuraringkula kura kutju palyalkatingi ilunytjakutuwangkara alatjiṭu. ²⁴ Palu kulilaya munuya mukuriwa palyanyku nyinanytjikitja kurunpa winki kampa kutjuparira. Panya Godalu nyuranya kurunpa kuwaritja palyanu palunya purunypa nyinanytjaku, ka nyara palulanguru nyura uti tjukaruru palyanyku nyinama paluru nyakula pukularinytjaku.

Kurunpa Kuwaritjatjara Nyinanytja

²⁵ Munu nyura uti ngunti wangkanytja wiyaringama munu kutjupangka wangkarampa

tjukarurungku kutju wangkama, panya nganana uwankara Godaku walytjapiti munula Christala kutjungka tjungu nyinanyi. Nyara palulangurula uti tjukarurungku kutju wangkama ngunti wangkanytja wiyangku. ²⁶⁻²⁷ Palu tjinguru nyura mirpañarirampa pikaringkuwiyangku wantima. Munuya kalala waṛa tiṭutjara mirpañpa nyinawiya mapalku kalyparingama mamungku nyuranya rawa mirpañpa ngaranyangka wituwitūra kurantjaku-tawara. ²⁸ Tjinguru aŋangu kutjupa kutitjunkupai nyinara, uti paluru kutitjunkunytjikitjangku kulintja wiyaringama munu tjukarururingkula war karima palumpa maiku munu aŋangu ngaltutjara tjuṭa kuļu ungkunytjikitja. ²⁹ Munu nyura uti aŋangu kutjupangka wangkarampa tjukurpa kura wangkawiyangku wantima. Munuya tjukurpa palya kutju wangkama aŋangu tjuṭangku kulira pukularinytjaku.

³⁰ Munuya Kurunpa Milmilnga tjiturutjiturunkunytja wiyangku wantima, panya paluru nyurala unngu nyinara nintilpai nyura Godaku walytja nyinanyangka. Panya Godalu Kurunpa Milmilnga nyurala unngu tjarpatjunu paluru nyurala nyinara nintintjaku alatji, “Mulapa Godalu nganaŋanya ngula Tjinṭu Malatjangka kuranguru wankarunkuku.” ³¹ Ka nyura mirpañpa rawangku kanyilwiyangku wantima, munu aŋangu kutjupaku pikaringkula mirpañ-mirpañtu wangkanytja wiyangku wantima, munu ngalytjurmarā warkinytja wiyangkuwantima, munuya aŋangu kutjupaku kuraringkuwiyangku wantima

alatjitu. ³² Palu ngaltunytjuya nyinama, munuya aŋangu kutjupa tjutaku kulu pulkara mukuringama. Munu kutjupangku nyuranya kurannyangkampa nyura uti palunya kalypangku kulira wantima. Panya Godalu nyuranya kura palyantjtanguru kalypangku wantingu Jesula Christalawanungku, palu purunypa nyura uti kalypangku wantima.

5

¹ Panya Godalu nyuranya mukulyangku waltyjanmara kanyini, ka nyura palumpa tjitji tjuta nyinanyi. Kaya nyanga palulanguru pulkara arkanma Godalu purunytju palyantjikitjangku. ² Panya Christanya nganampa pulkara mukuringkula ngalkilpa ilungu ka Godanya palumpa pulkara pukularingu. Ka nyura kulu uti palu purunypa aŋangu kutjupa tjutaku pulkara mukuringama.

³ Nyura panya Godaku waltyja tjuta, ka palulanguru nyura uti kuri waltytatjarangka kampangkatu ngariwiyangku wantima, munuya ngunti-ngunti tjunguringkuwiyangku wantima, munuya waltytatjaraku nyakula manyuringkula mukuringkuwiyangku wantima.

⁴ Munu nyura Godaku waltyja nyinarampa uti tjaangku warkinytjatjara wangkanytja wiyangku wantira wiru tjuta kutju wangkama. Munu Godanya kutju walkunma nyuranya wirura kanyinnyangka. ⁵ Kulila, panya aŋangu tjutangku kura nyanga palunya tjananya palyantjatjanu putu Christala tjunguringkula Godaku waltytjaringanyi, ka paluru putu

tjanampa mayatja nyinaku. Panya paluru tjana kura nyanga palunya tjananya palyara Godanya wantira god ngalypa-ngalypa tjutaku pulkara mukuringanyi.

Tilingka Utu Nyinanytjaku

⁶ Uwa, aŋangu kutjupangku nyuranya ngunti wangkara kurannyangka nyura uti palula tjanala kulira mulamularingkuwiyangku wantima, panya Godanya mirpanaripai ngunti wangkapai tjutaku, panya paluru tjana palula tungunpungkupai. ⁷ Ka nyura palulanguru tjanala tjunguringkuwiyangku wantima, munuya tjananya arkalwiyangku wantimatu. ⁸ Panya ngaŋmanypa nyurampa kulintja mungawaluru nguwanpa ngarangi ka nyura kura tjuta kutju palyalpai. Palu kuwari nyanga nyura Christaku waltyjaringkula kulintja utiringu munu nyura tilingka purunypa nyinanyi. Palu tilingka nyinapai tjuta tjukaruru nyinapai, ka nyura tjananya purunypa nyinama tilingka. ⁹ Panya nyura tilingka uti nyinara nyura wiru tjuta kutju palyalku munu palyanyku nyinara tjukarurungku kutju wangkaku.

¹⁰ Munuya Mayatja Godala tjapinma, ka nyuranya nintliku wiru tjuta kutju tjukarurungku palyantjaku. ¹¹ Munuya aŋangu panya mungawalurungka nyinapai tjuta arkalwiyangku wantima, panya paluru tjana kurakura tjuta kutju palyalpai. Palu panya nyura wiru tjuta kutju palyanma aŋangu panya paluru tjana ngunti palyantjatjanungku nyuranya nyakula kulira kunṭaringkunytjaku.

¹² (Panya tjana kampangkatu palyantjanya kura pulka mulapa, ka kutjupangku tjinguru kulira kuntaringkula unngu kutju kulini, “Wanti, ka ngarama kampangkatu.”) ¹³ Palu uwankara mungawalurungka palyantja tjuta tilingku utilku uti nyakunytjaku. ¹⁴ Panya tilingku irnyara utilpai, ka uwankara utiringkupai, palu purunypa kurakura tjuta utiringkuku. Panya iriti nyiringka walkatjunkunytja ngaranyi alatji, “Kunkuntjanuya wankariwa munuya ilunytjat-janu pakanma.

Ka Christalu nyuranya irnyara utilku.”

¹⁵ Kaya wanyu aŋangu ngurpa tjuta purunypa nyinawiyangku wantima munuya palyanyku nyinara tjukarurungku ngurkantanama.

¹⁶ Nyangatja panya kuwari tjinqtu kura, munu nyanga palulanguru tjinqtu kura tjuta ma-ngarala waŋanŋi, panya mamu tjutangku nyuranya ilangku nyanganyi kawantjingantjikitjangku. Kayanku nyara palula-tawara purkarangku nyakukatima palyanyku nyinanytjikitjangku.

¹⁷ Munuya ngunti kawakawaringkunytja wiyangku nyangama, munuya Godala tjinpinma paluru mukuringkunytjitja nyurala nintintjaku.

¹⁸ Munuya wama pulka tjikintja wiyangku wantima puntu nyuranku kurantjaku-tawara, palu pulkəra mukuringama Kurunpa Milmiltu nyurala unngu nyinara titutjarangku mayat-jarira kanyintjaku.

¹⁹ Munuya nyuranku tjunguringkula inma wiru tjuta inkama irititja munu kuwaritja, psalm tjuta kulukulu, munuya pukularira Mayatja Jesunya kurunpa winkingku inkara

walkunma. ²⁰ Munu nyura uti Mama Godalu nyuranya wiruṛa kanyinnyangka palunya pukultu tiṭutjarangku walkunma Mayatja Jesula Christalanguru.

Wati Minyma Kurirara Nyinanytjaku

²¹ Nyura panya Christanya wal̄kuṇi. Palulanguru nyuranku uti ngapartji-ngapartjingku wangaṇarangku kulinma.

²² Kulilaya! Minyma kuringku uti palumpa kuringka wangaṇarangku kulinma, panya paluru Mayatja Jesula wangaṇarangku kulilpai, nyara palu purunypa. ²³ Christalu panya palurunku Godaku walytja tjuṭa wankaṇunkupai, munu panya tjananya uwankara mayatja wirungku atunymara kanyilpai, ka palu purunytytu Godalu wati tjunu palurunku kuri atunymara kanyintjaku. ²⁴ Ka panya Godaku walytja uwankarangku Jesula wangaṇarangku kulilpai, palu purunytytu uti minyma kuri tjuṭangku wati kuringka wangaṇarangku kulinma.

²⁵⁻²⁶ Ka wati kuritjara tjuṭa, kulinmaya! Nyura uti nyurampa kuriku pul̄kara mukuringama, panya Christanya palumpa walytja tjuṭaku pul̄kara mukuringkula tjananya wiruṛa kanyilpai, palu purunypa nyura uti nyurampa kuriku pul̄kara mukuringama munu wiruṛa kanyinma. Panya Christanya palumpa walytja tjuṭaku ngalkilpa ilungu munu tjananya palumpa walytjaringkunyangka mantjira Godala tjungunu, panya paluru tjananya wiruntjikitjangku minangka paltjiṇu Tjukurpa Palya tjanala wangkara. ²⁷ Panya

Christalu alatji palyaŋu palumpa anangu tjuta wiru mulapa palyara puntu winki irnyara ngaranytjaku pałkunpatjara wiya, kura kutjupa kutjupatjara wiya.

²⁸ Uwa, alatji Christanya palumpa walytja tjutaku pulkara mukuringanyi, ka palu purunypa wati kiritjara uti palumpa kuriku pulkara mukuringama palurunku walytja mukuringkunytja purunypa, panya paluru minyma kuriku pulkara mukuringkula palurunku mukuringkunytja nintini. ²⁹ Panya anangu kutjupangku puntu palurunku walytjangku nyakula kuranmankupai wiya, palu walytjangku palurunku pulkara atunymankupai munu paltjalpai. Ka palu purunytju Christalu palumpa walytja tjuta palumpa puntu purunypa nyakupai munu pulkara atunymara paltjalpai. ³⁰ Panya nganaŋa-maṇtu uwankara palula tjungu ngaranyi kutjutu, palumpa puntu purunypa. ³¹ Ka panya iriti nyiringka walkatjunkunytja ngaranyi alatji,

“Watingku mama ngunytru wantikatira kungka kuri altira paluru pula tjunguringanyi, munu pula kutjara wiyaringkula kutjuringanyi alatjiṭu.” *

³² Uwa, wati minyma tjunguringkula kutjuringkupai, ka palu purunypa Christanya munu palumpa walytjapiti uwankara tjunguringkula kutjuringkupai. Ka tjukurpa nyanga paluru pulka mulapa ngaranyi puṭu nguwanpa kulin-

* **5:31** Genesis 2:24

tjaku. ³³ Ka wati kuri uti minyma kuriku pulkaṛa mukuringama munu palunya wiruṛa atunymara kanyinma, panya palurunku walyt-jangku atunymara kanyintja puṛunypa. Ka minyma kuringku ngapartji uti wati kuringka wangaṇarangku kulinma.

6

Tjitji Tjuta Munu Ngunytju Mama

¹ Tjitji tjuta, kulinmaya! Utı nyura Jesuku walytja nyinara ngunytjungka mamangka wangaṇarangku kulinma, panya Mayatjanya pulkaṛa mukuringanyi nyura palula tjanala wangaṇarangku kulintjaku. ²⁻³ Panya iriti Godalu tjukurpa pulka tjuta Mosela wangkangu, munu tjukurpa kutju paluru alatji wangkangu, “Uti nyura ngunytjungka mamangka wangaṇarangku kulinma.” Munu paluru nyangatja wangkanytjatjanungku kalkunu alatji, “Nyura ngunytjungka mamangka wangaṇarangku kulirampa rawa nguwanpa wanka pukulpa nyinaku manta nyangangka.”*

⁴ Kaya mamangku ngunytjungku ngapartji kulila! Utı nyuranku nyurampa tjitji tjuta palyanyku kanyinma pauntjingara wangkanytja wiyangku tjana mirpaṇarinytjaku-tawara. Palu wiruṛa tjananya mukulyangku pulkaṛa nintinma Mayatjaku nintiringkula palula wangaṇarangku kulintjaku.

Wati Warkaripai Tjuta Munu Mayatja

* **6:2-3** Exodus 20:12

⁵ Kaya anangu warkaripai tjutangku ngapartji kulila! Utu nyura mayatja mantatja tjutangka wangañarangku kulinma munu tjanampa ngulu-ngulu tjukaruru warkarima ngunti palyantja wiyangku, panya nyura Christala kulintja purunypa. ⁶ Uwa, mayatjangku wangkanyangka tjukarurungku palyanma paluru nyakula pukularintjaku. Munu tjinguru paluru warkarintjaku wangkara wantikatinyangka nyura uti palu purunyntjuu warka rawangku palyanma ankunyangka wantintytja wiyangku. Panya nyura Jesuku Christaku warkarinyi palumpa walytja nyinara. Ka paluru mukuringanyi nyura palulawanu tjukaruru nyinanyntjaku. Ka palulanguru nyura uti Jesula wangañarangku kulira mayatja mantatja tjutaku wirura tjukaruru warkarima kurunpa winki. ⁷ Panya nyura warka palyara Mayatja Jesuku kulu warkarinyi mayatja mantatjaku kutju wiya. Pala palulanguru mayatja paluru nyuranya warkaku wituwitunyangka nyura uti pukultu palyanma wangañarangku. ⁸ Munuya kulinma panya Mayatja Jesulu nyuranya ngula ungkuku nyura wirura tjukaruru warkarinyangka. Tjinguru anangu kutjupa tjuta mani wiya unytju warkaripai, palu ngula Godalu tjananya wirura warkarinyangka ungkuku. Tjinguru kutjupa tjuta manikitja warkaripai, ka Godalu palunya tjananya kulu ungkuku wirura warkarinyangka.

⁹ Kaya mayatja tjutangku ngapartji kulila! Watu panya warkaripai tjutaya

wirungku mukulyangku kulinma munu tjananya pauntjingantja wiyangku wantima, panya nyurampa Mayatja pulka nyinanyi nyara ilkaréngka, munu tjanampa kułu. Panya Mayatja nyara paluru uwankaraku mukuringkupai munu paluru palu purunypatu palyalpai aŋangu uwankaraku.

Godalu Nyuranya Kunpulpai Mamungku Kurantjaku-tawara

¹⁰ Ala, Mayatjalu nyuranya witulyankunyangkaya kunpu ngarama wantintyja wiya. ¹¹ Panya Godalu nyuranya kutjupa kutjupa tjutangka kuñpulpai mamungku kurantjaku-tawara, kaya nyanga palula tjanala kuñpuringama Satantu ngunti kurannyangka tungunpungkula ngaranytjikitja. ¹² Tjinguru nyura kulini nganaŋa mantangka nyanga nyinanyangka aŋangu mirpantju tjutangku kutju nganaŋanya rawangku Godalanguru arkara mauntananyi. Palu wiya, uti nyura aŋangu tjuta pulkara kulintja wiyangku wantima munuya waintara kulinma mamu tjuta. Panya paluru tjana pulkara war̄karinyi nganaŋanya Godalanguru mauntankunytjikitja, panya katutja witulya tjutangku munu mungawaluruku mayatja tjutangku munu kura kurunitja ilkaritja winkingku kulu nganaŋanya rawangku arkalpai. ¹³ Ka Godalu nyuranya witulyankunyangkaya wantintyja wiya kuwariṭu kuñpuringama. Ka tjintu kutjupa Satantu tjana nyuranya kurantjikitjangku arkannyangka nyura punkantja wiya ngaraku kuñpu. Munu

rawangku arkannyaŋga nyura kuŋpu alatjiṭu ngaraku.

¹⁴ Kaya riti ngarama Godalu nyuranya witulyankunyangka. Tjukurpa tjukarurukuya pulkaṛa nintiriwa munuya watarkuriwiyangku kulinma, panya tjaultjingku piltangka karilpa karpilpai araltjarinytjaku-tawara, palu purunypaya tjukurpa tjukaruru rawangku kulinma tarilarantjaku-tawara. Munuya tjukaruru palyanyku nyinama, panya tjaultjingku pilpirta anga-tjuṭulpai warmalangku wakantjaku-tawara, palu purunypaya tjukaruru mulapa palyanyku nyinama, ka Satantu nyuranya puṭu kuralku.

¹⁵ Munuya riti ngarama Godaku Tjukurpa Palya anangu tjuṭangka tjakultjunkunytjikitja. Panya tjaultjingku tjinatjangka tjarpala riti ngarapai ankunytjikitja, palu purunypaya riti ngarama Tjukurpa Palya wangkanytjikitja. ¹⁶ Munuya titutjara Godaku mulamularingama munu nyura pala palulanguru rapa ngaraku kura kutjupa kutjupa tjuṭa wirkankunyangka. Panya tjaultjingku kutiji kanyilpai angatjunkunytjikitjangku warmalangku kulaṭangka wakantjaku-tawara, palu purunypa nyura pulkaṛa mulamularingkunyangka mamungku nyuranya puṭu ngunti wangkara kuralku. ¹⁷ Munuya Godalu nyuranya wankaṛunkunyangka titutjara kuliṛa mulamularingama. Panya tjaultjingku mukaṭa wituwitu katangka kanyilpai kata wakantjaku-tawara, palu purunypa nyura wankaṛunkunytja kuliṛa mulamularingkunyangka Satantu nyuranya

kulintja puṭu kuraṇi. Munuya Godaku tjukurpa wangaṇarangku kulinma Kurunpa Milmiltu nintinnyangka. Panya tjaultjingku tjula wara kanyilpai warmala wakantjikitjangku, palu purunypaya Godaku tjukurpa kanyinma Satantu ngunti wangkanyangka tjukurpa tjukaruru wangkanytjikitjangku.

¹⁸ Munuya watarkuriwiyangku titutjarangku Godala tjapinma nyuranya alpamilantjaku. Palu Kurunpa Milmiltu paluru nintinnyangka kutju tjapinma. Munuya wankangku ala-alangku titutjarangku nyangama kampangkatu pitjala kurantjaku-tawara. Munuya anangu Godaku walytja uwankarakuṭu palula rawangku tjapinma. ¹⁹ Munuya ngayuku kulu Godala tjapinma ngayunya paluru tjukurpa kumpilitja Jesunyatjara utintjaku. Kaṇa palulanguru anangu uwankarangka tjukurpa palunya rapangku utira tjakultjunkuku tjana uti kulintjaku. ²⁰ Nyanga palumpa panyani paluru ngurkantara tjunu warka nyanga palunya palyantjaku. Kaṇa kuwari nyanga tjailangka nyinanyi. Kaya ngayuku Godala tjapinma ngayulu ngulu wiyangku rapangku Tjukurpa Palya Jesunyatjara wangkanytjaku.

Tjukurpa Malatja

²¹ Palu kuwariṇa wati Titjikatjanya nyuralakutu ma-iyanı nganampa panya malpa wiru. Wati nyanga palumpa panya nganana pulkara mukuringkupai. Nyanga paluru Mayatjaku warka wangaṇarangku kuliṛa palyalpai palumpa mulamularingkula,

munu raparingkula. Ka paluru nyurala wirkara tjukurpa ngayunyatjara uwankara tjakultjunkuku. Ka nyura kuliku yaaltji-yaaltji ngayulu nyinanytja, munu war̄ka nyaa ngayulu palyantja. ²² Uwa, palulanguruṇa palunya maiyanı nyuralakutu nyuranya kurunpa rapantjaku tjukurpa wangkara.

²³ Uwa, alatjituṇa walkatjunanyi. Ka Mama Godalu munu Mayatja Jesulu Christalu nyuranya Jesuku walytja uwankara kurunpa rapara pukulmanama, munu nyuranya mukulya pulka nyinanytjaku palyanma palumpa pulkara mulamularingkula. ²⁴ Uwa, Godalu nyuranya pukultju pulkangku kanyinma nyura Jesuku Christaku rawa alatjitu pulkara mukuringkunyangka.

**Tjukurpa Palya
Portions of the Holy Bible in the Pitjantjatjara
language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6